



# basic education

Department:  
Basic Education  
REPUBLIC OF SOUTH AFRICA

## NATIONAL SENIOR CERTIFICATE

LIBANGA 12

SISWATI LULWIMI LWEKUCALA LWEKWENGETA (FAL)

LIPHEPHA LESIBILI (P2)

LWETI 2014

EMAMAKI: 70

SIKHATSI: 2 ema-awa

Leliphepha linemakhasi la-18.

**TICONDZISO**

1. Fundza lelikhasi ngembikwekutsi ucale kuphendvula imibuto.
2. Ungalifundzi lonkhe liphepha lemibuto. Buka lokucuketfwe ekhasini lelilandzelako bese ubeka luphawu kulowo nalowo mbutu lobutwe ngetincwadzi lotifundze kulomnyaka. Emva kwaloko, fundza leyo mibuto lenetimphawu kuphela bese ukhetsa leyo lofuna kuphendvula yona.
3. Leliphepha lemibuto licuketse TIGABA LETINE  

SIGABA A:	Inoveli	(35)
SIGABA B:	Umdlalo	(35)
SIGABA C:	Tindzaba letimfisha	(35)
SIGABA D:	Tinkondlo	(35)
4. Phendvula imibuto LEMIBILI kuphela. MUNYE umbuto kusinye setigaba letimbili.  

**SIGABA A: INOVELI**  
Phendvula MUNYE umbuto wenoveli.

**SIGABA B: UMDLALO**  
Phendvula MUNYE umbuto wemdlalo.

**SIGABA C: TINDZABA LETIMFISHA**  
Phendvula YOMIBILI imibuto lebutwe ngetindzaba letimfisha.

**SIGABA D: TINKONDLO**  
Phendvula TOTIMBILI tinkondlo lekubutwe ngato.
5. Sebentisa luhlu lwekutikhumbuta kute usitakale.
6. Landzela ticondziso letisekucaleni kwaleso naleso sigaba.
7. Tinombolo tetimphendvulo atihambisane naleto temibuto njengobe tinjalo ephepheni lemibuto.
8. Cala lesa naleso sigaba ekhasini LELISHA.
9. Siphakamiso sekulawulwa kwesikhatsi singaba ngemaminithi la-60 kuleyo naleyo nzwadzi.
10. Bhala ngesandla lesibonakalako nalesifundzekako.

**LUHLA LWEKUTIKHUMBUTA**

Lelikhasi litawusita bahlolwa ekukhetseni imibuto LABAFUNA kuyiphendvula ngaphandle kwekufundza lonkhe liphepha lemibuto.

<b>SIGABA: A INOVELI</b>		
Phendvula umbuto wenoveli.		
<b>INOMBOLO YEMBUTO</b>	<b>EMAMAKI</b>	<b>LIKHASI</b>
1. <i>Kwasha Tikhotsa</i>	35	5
<b>SIGABA: B UMDLALO</b>		
Phendvula umbuto wemdlalo.		
2. <i>Lahloma Ladvuma</i>	35	8
<b>SIGABA: C TINDZABA LETIMFISHA</b>		
Phendvula YOMIBILI imibuto lebutwe ngetindzaba letimfisha.		
3.1 <i>Litsambo</i>	18	11
3.2 <i>Litsambo</i>	17	13
<b>SIGABA: D TINKONDLO</b>		
Phendvula TOTIMBILI tinkondlo lekubutwe ngato.		
4.1 Livulandlela	17	15
4.2 Tati kutsi ungubani	18	17

**LUHLA LWEKUTIKHUMBUTA**

Lelikhasi litawusita bahlolwa ekukhetseni imibuto LABAFUNA kuyiphendvula ngaphandle kwekufundza lonkhe liphepha lemibuto.

<b>SIGABA</b>	<b>TINOMBOLO TEMIBUTO</b>	<b>LINANI LEMIBUTO LEPHENDVULWAKO</b>	<b>THIKA</b>
<b>A: Inoveli</b> (Imibuto lemifisha)	1	1	
NOBE			
<b>B: Umdlalo</b> (Imibuto lemifisha)	2	1	
NOBE			
<b>C: Tindzaba letimfisha</b> (Imibuto lemifisha)	3	2	
NOBE			
<b>D: Tinkondlo</b> (Imibuto lemifisha)	4	2	

**CAPHELA:** Cikelela kutsi uphendvule imibuto lesetigabeni LETIMBILI kuphela.

**SIGABA A: INOVELI**

Phendvula umbuto wenoveli.

**UMBUTO 1: KWASHA TIKHOTSA – LL Dlamini**

Fundza lethekesthi bese uphendvula imibuto letawulandzela.

'Kubuhlungu-ke ngobe bona abanamsebenti neNgwenyama; kepha yona iyatihlupha ngabo. Bantfwana bemuntfu abalahlani. Kucabana kwabo kuba kwesikhashana. Kumele sihlngane nebanaketfu silungise tinkinga lesetidalekile,' kusho Mswati akhombisa kuba nelitsembe lekutsi simo sitawubuyela endleleni yaso leyetayelekile. Bahlale phasi banetseteke bakhumbule kadzeni basakhula lapho bebadlala ndzawonye khona ngelibumba, badlala umsheleletane, kutsiya tifu, kubhulana ngemacembe nekuhlaba inzema.

Wabuta wachubeka Mswati watsi, 'Veta umbono wakho Khambi ngalesimo. Ngabe budlelwane emkhatsini wami nabomnaketfu butawubuyela esimeni lesidzala nome konakele umlibe?'

'Konakele umlibe Ngwenyama,' kusho Khambi. Inhlitiyo yaMswati beyibuhlungu ngendlela lemangalisako angati kutsi lentfo angayilungisa njani. Ngemuva kwemizuzwana Khambi ahambile, kwangena Sicobolonjwane naye aphetse tindzaba.

'Ngiphangisele Sicobolonjwane ngabe uphetse tiphi lamuhla? Batsini bomnaketfu? Ngabe bangilahla nyalo ngiphila nome sengifile?' 'Konakele Ngwenyama; konakele,' kusho Sicobolonjwane ehluleka kukhuluma emavi lavakalako. 'Yini leyonakele Sicobolonjwane? Khuluma ngive nhloli yami.' 'Ngikwentile lebengitfunywe kona ngemphumelelo. Ngiphatfwe kahle ngendlela lemangalisako kaMahamba.'

'Ungalandzi lokunyenti nhloli yami, kepha shaya ngalejubako!' Kusho Mswati aphelelwa sineke ngobe acondze kuva kahle loku lokushiwo nguSicobolonjwane.

[Likhasi 53–54]

1.1 Ngubani umlingisi logcamile kulethekesthi lengenhla?  
(Khetsa YINYE imphendvulo.)

- A Sicobolonjwane.
- B Mswati.
- C Sandlane.
- D Khambi.

(1)

1.2 Shano kutsi lokwenteka kulenoveli kwenteka ngasiphi sikhatsi.  
(Khetsa YINYE imphendvulo.)

- A Sikhatsi sanyalo.
- B Sikhatsi senala.
- C Sikhatsi sakudzala.
- D Sikhatsi semphucuko.

(1)

- 1.3 Kungani Tsandzile atfolakale abusa sive seMaswati?  
(Khetsa YINYE imphendvulo.)
- A Loku kulisiko leMaswati.  
B Tsandzile ubangisa Mswati.  
C Tsandzile bekabambele Mswati.  
D Mswati bekasaba kubusa. (1)
- 1.4 Nguyiphi indzima ledlalwa yinceku yaMswati endzabeni? (1)
- 1.5 Kungani Mswati abitwe ngekutsi, 'iNgwenyama'? Bhekisa enovelini yonkhe. (1)
- 1.6 Ngaphandle kwenkinga yekungevani nebanakabo, nguyiphi lenye inkinga lekabukene nayo Mswati? (1)
- 1.7 Condzanisa emagama lakuKHOLOMU A netimphendvulo letikuKHOLOMU B.

IKHOLOMU A		IKHOLOMU B	
1.7.1	Sicobolonjwane	A	Indvuna yenkhosi.
1.7.2	Tsandzile	B	Libutfo laMswati.
1.7.3	Sandlane	C	Sigodlo saMswati.
1.7.4	Embhuleni	D	Indlovukati.
1.7.5	Giba	E	Inhloli.

(5)

- 1.8 Bhala emaphuzu LAMATSATFU lafakazela kutsi kusabanjelelwe emasikweni kulenovelini. (3)
- 1.9 Kungevani kwemadvodzana enkhosi kunamuphiumphumela esiphetfweni salenzaba? Bhala emaphuzu LAMABILI. (2)
- 1.10 Chaza kutsi ligama lelinikwe Sicobolonjwane lelitsi, 'Dzabulatinkhalo', liyamfanela yini. (2)
- 1.11 Sinjani similo saSidwala? Bhala emaphuzu LAMABILI. (2)
- 1.12 Catsanisa lokwenteka kutembusave enovelini nasesikhatsini lesiphila kuso. (2)
- 1.13 Wena kube bewunguMswati bewungayicatulula njani inkinga yekungevani kwakhe nebanakabo? Bhala emaphuzu LAMABILI. (2)
- 1.14 Shano kutsi ubaluleke ngani umsebenti lowentiwa yinyanga yaMswati. Bhala emaphuzu LAMABILI. (2)

- 1.15 Ngabe **kuliciniso** nobe **kuliphutsa** yini kutsi Sicobolonjwane bekamtsandza Mswati wesibili? Sekela imphendvulo yakho ngekubhekisa etheksthini lengenhla. (2)
- 1.16 Ngabe lesihloko lesitsi, 'Kwasha Tikhotsa', siyahambisana yini nengcikitsi? Usho ngani? (2)
- 1.17 Ngekubona kwakho besikahle yini seluleko lesinikwe Mswati yiNdlovukati Tsandzile? Sekela ubhekise ethekhsthini lengenhla. (2)
- 1.18 Ngusiphi sifundvo lesitfolakala kulenoveli. Sekela imphendvulo yakho. (3)

**[35]****SAMBA SESIGABA A: 35****NOBE**

**SIGABA B: UMDLALO**

Phendvula umbuto wemdlalo.

**UMBUTO 2: LAHLOMA LADVUMA – Z Motsa**

Fundza letheksthi bese uphendvula imibuto letawulandzela.

TSEMBATIVE:	Ngembetse ingubo yemahloni kunyatsela inkhundla etinyatselweni tesigodlo netinyatselweni tenkhosi yami, iMbiba yeJijimeza! Ngembetse siphuku semahloni kungena enkhundleni loMdzala sekemile. Lucolo kini nonkhe Batfwa! Akusindzelelo ngigilwe sikhatsi! Lidlojwa libhekile baketfu asicolise kuloko.
NDVUKUTEMPHI:	<i>(Ahlebela Qedizizwe)</i> uyatsakatsa nangumuntfu. Lobengitsi utsi nimshiye adzakwe asangene akhohlwe nelibito lakhe. Utsi umnatsise bona nje lobu lobubuya kulenyanga ...?
QEDIZIZWE:	<i>(Naye akhulumela phansi)</i> UJijimeza ugcwele izimanga Mngane!
TSEMBATIVE:	Batfwa! Ngete ngavikisana ngemavi nemusa wababe. Cha! Mine ngitsi nje kini lawulani tinhlitiyo tenu. Wami umbono kwakha sive lesibumbene sabobabemkhulu. Lowo nalowo wetfu unelikhono lakhe lelingesilo lalomunye. Kimi kumcoka kutsi sonkhe, ngisho nalosemncane, alati likhono lakhe lekwakha sive. Kanjalo sonkhe sitatikhandza sinemsebenti locotfo nalobumba sive lapha eButfwa. Sonkhe sinesikhala lesisigcwalisako lapha eveni leButfwa. Angiphikisani nemsu wababe ... inkhosi itakuba yinkhosi ngetento tayo, hhayi ngekusikisa ngemlomo kuhle kwelijaha liheha intfombi. Ngako-ke lami liso libheke kini nonkhe, ngamunye! Simunye! Siyinqaba! Siyimbumba!
IMBIBA:	Senitivele-ke! Njengemsimeto weButfwa sitawucela lowo lomele kuba ngumake wesive nebukhosi kutsi asondzele atekwetfula lolu ludziwo lemukelwa ngalo kulowo lesesitamphakamisa simkhunge nganayi indvuku yebukhosi (Kutsi nya) ludziwo ... <i>(Ehlise sandla lesiphetswe intfonga)</i>
KHETSIWE:	<i>(Asukume ete edvute neMbiba emehlo atse njo phansi etinyaweni. Kodvwa uta nje ulengise tandla akakaluphatsi ludziwo afike aguce.)</i> Ngesaba Batfwa. Ngihambate, ludziwo lufile.

[Likhasi 31–32]

2.1 Ngubani umdlali lolichawe kuletheksthi lengenhla?  
(Khetsa YINYE imphendvulo.)

- A NguKhetsiwe.
- B NguVusematfwa.
- C NguQedizizwe.
- D NguNdvukutemphi.

(1)



- 2.2 Ichazani lenkhulumo lelandzelako etheksthini lengenhla?  
'Inkhosi itawuba yinkhosi ngetento tayo.'  
(Khetsa YINYE imphendvulo.)
- A Itawuba yinkhosi ngekusebenta.  
B Itawuba yinkhosi ngekukhuluma.  
C Itawuba yinkhosi ngekulunga.  
D Itawuba yinkhosi ngekuba nenkhani. (1)
- 2.3 Ngusiphi sento lesakhombisa kutsi vele nguVusematfwa lotawuba yinkhosi?  
(Khetsa YINYE imphendvulo.)
- A Ndvukutemphi wabulala ludziwo.  
B Madzandza watfolakala akhulelwe.  
C Khetsiwe akabufuni bukhosi.  
D IMbiba igulela kufa. (1)
- 2.4 Bhala indzawo lapho senteka khona lesicashunwa semdlalo lesingenhla.  
(Khetsa imphendvulo yakho.)
- A Kuselawini laNdvukutemphi.  
B Kusekhaya leMbiba.  
C Kusenkundleni yesibhimbi.  
D Kusentsangeni yaKhetsiwe. (1)
- 2.5 Condzanisa emagama lakuKHOLOMU A netimphendvulo letikuKHOLOMU B.
- | KHOLOMU A |           | KHOLOMU B |                            |
|-----------|-----------|-----------|----------------------------|
| 2.5.1     | Sigwaca   | A         | Yintfombi yaNdvukutemphi.  |
| 2.5.2     | Qedizizwe | B         | Lijaha lelidzabuka Kazulu. |
| 2.5.3     | Madzandza | C         | Indvuna yenkhosi           |
- (3)
- 2.6 Chaza kutsi Vusematfwa wagcina abutfolile yini bukhosi. (2)
- 2.7 Sizatfu sini lesenta kutsi boNdvukutemphi naQedizizwe batsi Vusematfwa uyatsakatsa? (1)
- 2.8 Shano kutsi lomdlalo wenteka esikhatsini sakudzala nobe sanyalo. Sekela. (2)
- 2.9 Nguyiphi indzima ledlalwa nguSigwaca naTfolwane ekutfufukiseni lomdlalo? (2)
- 2.10 Shano kutsi kufa kweludziwo kumele luphi luphawu emdlalweni? (2)

- 2.11 Yini lengenta lesiceshana lesingenhla sidlaleke esiteji? Bhala KUBILI. (2)
- 2.12 Budlelwane emkhatsini kwaVusematfwa naNdvukutemphi ngulobunjani? Sekela imphendvulo yakho. (2)
- 2.13 Wena ucabanga kutsi umbhali bekacondze kusitjelani ngaTsembative naKhetsiwe kulesicashunwa lesingenhla? (2)
- 2.14 Shano kutsi letigameko letenteka emdlalweni tiyakholweka yini. Sekela imphendvulo yakho ubhekise kuletheksthi lengenhla. (2)
- 2.15 Ngabe lona lobitwa yiMbiba nguye yini Vusematfwa? Chaza. (2)
- 2.16 Umdlalo lobhaleke kahle ngulowo loveta lokungakalindzeleki esiphetfweni. Bhala KUBILI lokungakalindzeleki kulomdlalo. (2)
- 2.17 Umbhali uphumelele yini ekwetseni Ndvukutemphi ligama lakhe? Sekela imphendvulo yakho. (2)
- 2.18 Ngabe **kuliciniso** nobe **kuliphutsa** yini kutsi lona lotsatsa bukhosi akusuye Vusematfwa? Sekela imphendvulo yakho. (2)
- 2.19 Sifundvo sini lesitfolakala kulomdlalo? Sekela ngekubhekisa emdlalweni. (3)

**[35]****SAMBA SESIGABA B: 35****NOBE**

**SIGABA C: TINDZABA LETIMFISHA****UMBUTO 3: LITSAMBO – EJ Mhlanga**

Phendvula YOMIBILI imibuto lebutwe ngetindzaba letimfisha.

3.1 Fundza lethekesthi lengentasi bese uphendvula imibuto letawulandzela.

**'Kuhle Ketfu!' – AD Mnisi**

'Babe, lentfombi yakaMdluli ingitjele kutsi se ... seyitetfwele,' kusho Peter cedze wabindza wabuka phasi.

'Hheyi wena mfana! Uyativa nje kutsi utsini? Ucabanga kutsi njengaloku sewunguthishela sewukhulile? Tibonele lamadameshe akho ngobe uwente ngenhloso,' washo lomdzala wahlaba umnyango. Waphuma Mahlindza Magagula washiya lijaha lakhe solo libheke phasi lidla ematsambo enhloko.

Wasala yedvwa endlini Peter ajulile ngemcabango. Inkinga lenkhulu ngulena yekutsi yena utimisele ngekutsi utsi ucamba uyabonakala lomtfwalo, yena abe asashadile. Manje simamnyango nangu uyise atfukutsela shengatsi sewumbikele kutsi sewubulele umuntfu.

'Noko ngisatawuphindze ngimncenge babe kutsi amane angisingatse kuloku lesengihlangabetane nako.'

Uyise waPeter ngaleso sikhatsi bekasahleti ngaphasi kwesihlahla semgilebisi. Peter wabona kutsi kuncono angasaphotisi emaseko, akavele anikele kuye amncenge.

'Ngiyacolisa Mtfombeni kukuphatsa kabi. Siswati sityo umntfwana ushayela uyise tinyoni. Bekungasiyo injongo yami kutsi ngikukhube ngalendlela. Nami ngentiwe nguleninga lesengihlangabetane nayo. Ngiyalibona liphutsa lami. Manje njengaloku sekwentekile ngalendlela, lesengitimisele ngako kutsi ngisale ngishada kungakabonakali kutsi sewutetfwele. Mtfombeni, ngiyaludzinga kakhulu lusito lwakho kuloludzaba. Nangingahlakanekelwa nguwe babe, ngabe kusho kutsi konkhe kwami lengifisa kukwenta kutawuba mnyama, ngivelelwe ngemashwa. Mane ungivele tsine Mtfombeni. Imali yona ikhona. Ngitawulobola ngiphindze ngishade futsi.'

[Likhasi 17]

3.1.1 Mahlindza uluhlobo luni lwemlingisi?  
(Khetsa YINYE imphendvulo.)

- A Losicaba.
- B Longummeleli.
- C Loyindilinga.
- D Logcamile.

(1)

3.1.2 Ngabe singenisiso salendzatjana siyaheha yini?  
(Khetsa YINYE imphendvulo)

- A Siyaheha ngobe inkinga ivetwe ekucaleni.
- B Siyaheha ngobe sinemlingisi munye.
- C Asihehi ngobe inkinga ivetwe ekugcineni.
- D Asihehi ngobe sinemlingisi munye.

(1)

3.1.3 Condzanisa emagama lakuKHOLOMU A netimphendvulo  
letikuKHOLOMU B

IKHOLOMU A		IKHOLOMU B	
(a)	Embhuleni	(i)	Uyatigcabha ngemshado wemsa wakhe.
(b)	Mahlindza	(ii)	Luhlelo lwetemishado.
(c)	Sikhumba	(iii)	Umele Mahlindza emalobolweni.
(d)	Kuhle Ketfu!	(iv)	Ntfombi ngumhlengikati.

(4)

3.1.4 Phawula ngekuhambisana kwenkhulumiswano nemnyakato kulendzatjana lengenhla.

(2)

3.1.5 **Kuliciniso** nobe **kuliphutsa** yini kutsi Peter ucindzetelwa simo kutsi asheshe ashade naCynthia? Sekela ngeliphuzu LINYE.

(2)

3.1.6 Chaza ingcikitsi yalenzaba ubhekise kuPeter naCynthia.

(2)

3.1.7 Ngabe tigateko letenteka kuletheksthi lengenhla tiyakholweka yini? Sekela ngemaphuzu LAMABILI.

(2)

3.1.8 Ngekubona kwakho yasombululeka yini inkinga yaPeter yekutetfwala kwaCynthia? Sekela.

(2)

3.1.9 Bhala sifundvo lesingafundvwa bantfu ngesento saMahlindza naLomavundvo kulendzatjana. Bhala emaphuzu LAMABILI.

(2)

## 3.2 Fundza letheksthi lengentasi bese uphendvula imibuto letawulandzela.

**LIGUNDVWANE ESIKHWAMENI – Martha F Mkhonza**

Sitfutsa lapha eTjakastad nje Msibi uyise webantfwabami sewutsenge indlu edolobheni eWitbank ngoba yena sewunesikhatsi asebentela ngakhona. Nami ngayibuka ngayitsandza lendzawo. Maye kumnandzi kuhlala edolobheni. Kubindze kutse duvu, phela belumbi abevani nemsindvo. Edolobheni nguka 'mind your own', kwasho belumbi.

Kute lonaka lomunye, ungatihluphi. Akunamlumbi lotakunconcoatsela atewucela kunaniselwa imphuphu, nobe acele emakhambi elitiya, kumbe shukela. Nalamadvodza latsi angadla emabele agijimise bafati, asuke afike kahle lapha edolobheni. Watenta luhlanya uva ngemoto yemaphoyisa seyima ntsi emnyango kakho.

Akufani nalapha esabelweni. Akube nguLesihlanu utawuva umoya. Babodvwa labavulela emagumbagumba bawafikise ekugcineni. Babodvwa labashaya tigubhu nemantjomane. Angisakhulumi ngaletigebengu letibamba inkunzi. Akulalwa kusa ubuka ngewayitolo.

Kwangenta ngangawutfoli-ke umsebenti. Njalo ngaLesihlanu umtfwalo uba sebhokweni sengiya kami. Ngivame kubuya ngeMsombuluko ekuseni.

Ngivuka lokwa emakati asageza buso, ngentele kufika ngesikhatsi emsebentini. Ngivamile kutsi uma sengibuya ngibuye newashini yaMsibi lengcolile khona ngitoyiwashwa ngibuye ngiyi-ayine. Yindlela nami lengiticitsetsa ngayo situnge, ngoba ngiyagudvuta nje lapha endlini, lomampimpane lengihlala naye ete ngambala.

Nako-ke ngeMsombuluko ngivuka ngembulukusa ngitsatsa sikhwama sewashini ngisilayisha emotweni ngihamba. Ngitsi laba nemfana wami silibangise eTjakastad. Ngefika ngangena ngehlisa sikhwama sewashini ngasidzimula phansi.

[Likhasi 82-83]

3.2.1 Yini inkinga lebukene nemlingisi lomkhulu? (1)

3.2.2 Nguyiphi inkholo lakholelwa kuyo make waSifiso? (Khetsa YiNYE imphendvulo.)

- A Ukholelwa etinyangeni.
- B Ukholelwa kuNkulunkulu.
- C Ukholelwa ku-Ala.
- D Ukholelwa kuSathane. (1)

3.2.3 Linani lebalingisi endzabeni lemfisha kumele kube ... (Khetsa YINYE imphendvulo.)

- A Balingisi labengca kulabasihlanu.
- B Balingisi labangengci kulabasihlanu.
- C Balingisi labengca kulabalishumi.
- D Balingisi labangengci kulabalishumi. (1)

- 3.2.4 Nguyiphi indzima ledlalwa nguSifiso ekutfukiseni lendzatjana? (2)
- 3.2.5 Phawula ngenzawo lapho yenteka khona lendzatjana lengenhla. Bhala emaphuzu LAMABILI. (2)
- 3.2.6 Shano kutsi iphetseke njani lendzatjana. Bhala emaphuzu LAMABILI. (2)
- 3.2.7 Chaza kutsi Sifiso limlandzele kanjani libito lakhe kulendzatjana. (2)
- 3.2.8 Ngabe lokwenteka kulendzatjana kuyakholweka yini? Chaza. (2)
- 3.2.9 Chaza ngekuhambisana kwesihloko nengcikitsi yalendzatjana. (2)
- 3.2.10 Sitsini sifundvo salendzatjana lengenhla nawubhekise esimilweni saNkhosikati Msibi? (2)
- [35]**

**SAMBA SESIGABA C: 35**

**NOBE**

**SIGABA D: TINKONDLO****UMBUTO 4: LETFWESE – MS Magagula**

Phendvula TOTIMBILI tinkondlo lekubutwe ngato.

4.1 Fundza lenkondlo lelandzelako bese uphendvula imibuto letawulandzela.

**LIVULANDLELA – TM Mongwe**

- 1 Washaya baniyo besipakatani
- 2 Wabadvunsuta besipakatani
- 3 Batsi nabacabanisa inhloko, beva kutsi iyashisa
- 4 Bagcwala tiganga nemahlatsi
- 5 Usemuva kwabo neFRELIMO
- 6 Kwahhonya umfati
- 7 Ingenile yakho chawe lemachawe.
  
- 8 Wangena wawangenela eMaputukezi
- 9 Ungahleki, futsi ungashushi
- 10 Wawadvudvula agibela tindiza ngematata
- 11 Aphindzela ePutukezi kukubi
- 12 Usemuva nesipakatani
- 13 Ashiya inyosi ngemagonso
- 14 Wasala advonsa umoya Soshangane
- 15 Waba nekuthula enhlityweni yakhe.

[Likhasi 77]

4.1.1 Ngubani lelivulandlela lekukhulunywa ngalo kulenkondlo lengenhla?  
(Khetsa YINYE imphendvulo.)

- A Mswati wesibili.
- B Samora Mashele.
- C Thabo Mbheki.
- D Albert Luthuli.

(1)

4.1.2 Shano kutsi lenkondlo iluhlobo luni?

(Khetsa YINYE imphendvulo.)

- A Isonethi.
- B Inkondlosililo.
- C Inkondlomlandvo.
- D Ilirikhi.

(1)

- 4.1.3 Shano luhlobo lwebunkondlo lobudalwa ngulamagama ladvwetjelwe kulemigca lelandzelako:
- Wabashaya baniyo besipakatani.  
Wabadvunsuta besipakatani.
- (Khetsa YINYE imphendvulo.)
- A Luchumanosicalo.  
B Luchumanosigcino.  
C Luchumanomkhatsini.  
D Luchumano lolutjekile. (1)
- 4.1.4 Ngabe lenkondlo ikhuluma ngani? Bhala emaphuzu LAMIBILI. (2)
- 4.1.5 Shano luhlobo lwemvumelwano loluvetwa ngulemigca lelandzelako:
- Wangena wawangenela emaPutukezi  
Ungahleki, futsi ungashushi  
Wawadvudvula agibela tindiza ngematata (1)
- 4.1.6 Esitanzeni se-2 sonkondlo usebentise sihabiso. Sibhale phasi. (1)
- 4.1.7 Usitjelani sonkondlo nakatsi, 'Wabadvunsuta besipakatani'? (2)
- 4.1.8 Kungani eMaputukezi ahlaselwa nasilandzela lenkondlo? Nika tizatfu LETIMBILI. (2)
- 4.1.9 Shano kutsi sonkondlo bekasesimemi lesinjani nakabhala lenkondlo. Sekela imphendvulo yakho. (2)
- 4.1.10 Kungani sonkondlo asebentise loluphawu (,) emgcezi longentasi? 'Ungahleki, futsi ungashushi' (2)
- 4.1.11 Bunkondlo buni lobutfolakala kulemigca lelandzelako? Sekela.
- Kwahhonya umfati  
Ingenile yakakho chawe lemachawe. (2)
- [17]**



## 4.2 Fundza lenkondlo lengentasi bese uphendvula imibuto letawulandzela.

**TATI KUTSI UNGUBANI – CD Masilela**

- 1 Uma unguMfaniseni, unguFananatsi,
- 2 Uma utitsambisa kwabhanana,
- 3 UnguJabulisa tihlwele,
- 4 UnguTsatsekile,
- 5 Utenta limpentjisi lelilindzele kukhiwa,
- 6 Phaphama! Phepha elugibeni!
- 7 Litje lime ngelutsi Ntfombi yababe!
- 8 Tati kutsi ungubani,
- 9 Yati kutsi uvelaphi,
- 10 Yati kutsi uyaphi.
- 11 Uma ungatati utawufana natibutse
- 12 Lobutsa tonkhe tibi nemikhuba,
- 13 Tibutse lohungulwa tigemeleme tetigebengu.
- 14 Utawudvonswa liphunga leligwayi neletidzakamiva.
- 15 Uma ungatati kutsi ungubani
- 16 Utawuba nguSiyamlandzela.
- 17 Tati kutsi ungubani.

[Likhasi 68]

4.2.1 Hlobo luni lwebunkondlo lolutfolakala kulomugca longentasi?  
Uma unguMfaniseni, unguFananatsi,  
(Khetsa YINYE imphendvulo.)

- A Luchumanosicalo.
- B Imvumelwanosicalo.
- C Ilirikhi.
- D Sidvonsamoya.

(1)

4.2.2 Khokha ligama lelisetjentiswe enkondlweni yonkhe lengenhla  
ngekuphindzaphindza.

(1)

4.2.3 Shano kutsi lenkondlo lengenhla iluhlobo luni.  
(Khetsa YINYE imphendvulo.)

- A Inkondlomlandvo.
- B Isonethi.
- C Isathaya.
- D Inkondlosililo.

(1)

4.2.4 Bhala bunkondlo lobutfolakala kulemisindvo ledvwetjelwe  
kulemigca lengentasi.

Ungutsatsekile,  
Utenta limpentjisi lelilindzele kukhiwa.

(1)

- 4.2.5 Sinongo sini senkhulumo lesisetjentiswe kulomugca longentasi?  
'Uma utitsambisa kwabhanana' (1)
- 4.2.6 Ngemaphuzu LAMABILI bhala lokushiwo yinkondlo lengenhla. (2)
- 4.2.7 Ngabe sonkondlo ucondze kusitjelani ngenkhulumo lengentasi?  
'Tibutse lohungulwa tigemege me tetigebengu.'  
(Khetsa YINYE imphendvulo.)
- A Utawuyekela kwenta tintfo ungakacabangi.  
B Utawuvuma nobe yini lokhohliswa ngayo.  
C Utawuvuma kulalela batali bakho.  
D Utawuvuma kwenta lokuhle. (1)
- 4.2.8 Ngabe lomugca longentasi **ngumbono** nobe **liciniso** nawufundza lenkondlo? Sekela imphendvulo yakho.
- 'Uma ungatati kutsi unqubani utawuba nguSiyamlandzela.' (2)
- 4.2.9 Kungani sonkondlo asebenzise loluphawu, (!) emgceni longentasi?  
'Phaphama! Phepha elugibeni!' (1)
- 4.2.10 Ngabe leligama lelisetjentiswe emgceni longentasi lelisi,  
'UnguTsatsakile', lisho kutsini? (1)
- 4.2.11 Ngabe bakhona yini bantfu labangubo Jabulisa tihlewele emphakatsini wangakini? Sekela imphendvulo yakho. (2)
- 4.2.12 Chaza kutsi yini lebangela sonkondlo akhetse lamagama latsi,  
'**Phaphama! Phepha!** emgceni longentasi.  
Phaphama! Phepha elugibeni!' (2)
- 4.2.13 Sifundvo sini lesivetwa ngulenkondlo emphakatsini? Nika emaphuzu LAMABILI. (2)

[18]

**SAMBA SESIGABA D: 35**  
**SAMBA SAKO KONKHE: 70**